

Renato Fuccini: no l'è na piata biencia, l'è "Na vita a colores"

L pitor fiorentin-fascian à prejentà sie liber enstadi te sala de Comun de Cianacei. N'opera che reiona de el e de sia èrt

Èrt - Siede envié a la prejentazion del liber "Una vita a colori" del pitor Renato Fuccini. Coscita dijea n biliet manà fora per la cèses dal Comun de Cianacei enstadi. E a chesta prejentazion n muie de jent no à volù mencèr, ajache delvers se cognosc l valor de l'onom de Renato desche pitor e duc era curiosc de entener l'opera contegnuda te chest liber. Amò, fosc più che dut, duc cognosc e ge vel ben a chest personaje, duc se recorda delvers e i lo veit amò jir stroz per la strèdes de Cianacei, enceben che ades l stente de più e l no se lasce più veder trop de spes.

Na bona ocasion per troèr endodanef n amich, apede che n gran artist. Coscita da les 5 domesdi te sala de Consei de Comun de Cianacei, en sabeda ai 27 de otober se à binà n bon mingol de jent, duc vertesc per scutèr la paroles del pitor e di etres prejenc dedò al microfon.

A tor la parola per prum l'è stat l'ombolt de Cianacei, Silvano Parmesani, che sobito l'à saludà duta



La soracuerta del nef liber de Renato Fuccini.

la jent vegnuda a scutèr e Renato. L'ombolt l'à volù soraldut l rengrazièr per aer portà n bon mingol de cultura te val e per aer depend nosc raion



Dò la prejentazion Renato Fuccini à fat n dessegn a vigni persona che comprèa n liber.



A la prejentazion (da cencia) Luca Guglielmi, Silvano Parmesani, Renato Fuccini e Claudio Roghi.

con sia spenelèdes tant lijieres: "Ties pèrt de noscia comunanza da n muie de egn e l'è stat dassen bel veder coche te te ès fat ite e chel che te n'è portà" à dit amò Silvano Parmesani. E defati Renato Fuccini fèsc oramai pèrt a pien derit de la comunanza de Cianacei. Nasciù ai 10 de dezember del 1936, l'à passà a Firenze la maor pèrt de si egn. Aboncont, da la fin di egn '90 l se à tramudà te Fascia e chiò l'è restà fin ades.

N derit de comunanza vadagnà no demò de gra a sia longia prejenza te Fascia, ma ence per sia ativitèdes te val, che se lascia recordèr con gran piajer. Apede a Silvano Parmesani l'era ence Luca Guglielmi. L neo-conseier ladin l no à volù mencèr te chesta ocasion e l'à portà n personèl recort de Renato: "Duc se recordon delvers de canche nose Renato jia iinante endò con si Ciao...". N recort che, apede a duc i rengraziamenc e l rejonèr de èrt, l'à trat fora n fon sentiment e l'è sciudà ite duta la sala

enceben la pievia che batea fort su la fenestres.

L'amor de Renato Fuccini per noscia val

La parola é stata sessaben lascèda ence al prum protagonist de chesta prejentazion, Renato Fuccini, che l no se à aboncont slongia più che tant. Pien de emozion, l pitor l se à limità a dir doi paroles de rengraziament ai prejenc e l'à dapodò lascià che fossa l'editor e critich Claudio Roghi a dir vèlch de più su chest nef projet. N liber che tol ite mingol dut chel che l'è Renato, sia èrt ma ence vèlch gustegol avveniment de sia cariera. "É cognosciù Cianacei acà 30 egn - l'è pontà via Claudio Roghi - siere demò de passaje. Dapodò son ruà amò e me é fermà chiò per mingol de gra a n amich, Renato Fuccini. Coscita é cognosciù na comunanza da no creer e é capi perché Renato se troèa tant delvers

chiò con voetres".

L critich à volù proèr ence a depenjer l'artist, tant te sia èrt che desche persona: "Renato l'è n om vèlch outa subitous, con n lengaz fort toscan, mingol senester, ma culturalmenter n muie sèvech. Te l'èrt l'è nasciù te la Firenze di dures egn dò la fin de la vera e, troà sia strèda e n bon suzess, l'è stat bon de se mantegnir semper atuèl e de nonzèch. Chest - à dit amò l critich - ence de gra a na sort de èrt che no chier l shock, descheche fèsc de n muie anchecondi, ma che chier l'emozion". E te chest zenz'autoer Renato Fuccini l no mencia. Si chèdres é ciauc, i sciauda ite l cher e i reiona a chi che ge vèrda.

N muie de chisc reiona de Fascia, soraldut de Cianacei, ma ence de tradizion e cultura fascènes: "Te chest Renato Fuccini l'è schèsi n impresionist - à dit Claudio Roghi - ajache l'è stat bon de fermèr momenc specifich che moscia Fascia te n temp prezis. Te si chèdres se pel troèr detaes de storia e cultura coscita coche i era canche i é stac depend, se pel veder per ejempie coche l'era fat n strument e coche l vegnia durà".

Canche l critich à fenì de rejonèr l'è ruà l moment del buffet. Soraldut, endèna che valgugn magnèa e beea en compagnia, Renato l se à metù a desposizion de la jent che dezidea de comprèr sie liber, ge fajan a ogne un n bel dessegn su una de la piata biences laite. Sessaben, chela de Renato Fuccini no l'è na piata biencia, l'è "Una vita a colori".

N resultat che vegn fora da n amor, da l'amor che Renato Fuccini à proà per noscia val, per na val che ge à dat alberch per n muie de egn e che en cambie l'è podù aer n bon paament, l'emozion di chèdres e di recorc che nesciugn pel più descancelèr.

Daniele Verra